

COUNTRY CLUB NOORD PABIEN

E anja aki Country Club Noord ta di fiesta, na promer lugar pasobra dia 21 di februari e a cumpli su di dies anja di existencia y tambe pasobra dia 18 di februari su clubgebouw a wordo inaugura, oficialmente.

E organisacion aki a wordo fundá dia 21 di februari 1968 pa senior Pedro Tromp, mihor conoci como Pedro Dokter. Na principio tabatin solamente algun jovenes cu tabata reuni na su cas y practica algun deporte.

Den transcurso di anjanan e organizacion a crece, y hopi mayornan tambe a afila nan mes na e organizacion. Asina a nace e idea pa forma un directiva y busca un nomber pa e organizacion. E nomber Country Club Noord a wordo mas gusta, cual nomber a wordo manda aden pa senior Tarcisio Semeleer. E directiva e tempo ey tabata bao presidencia di Sr. Jan Jacobs.

Poco poco a nace e anhelo den e miembronan pa construi nan mes edificio, den cual nan por reuni y haci fiestanen.

Esey pasobra semper nan tabata haci nan fiestanen, p.e. sinterklaas, dia di mama, y tata, carnaval, pasco y anja nobo den Plantage Tromp of na un cas di e miembronan. E mapa a wordo pinta door di Dijkhoff Drafting Bureau. E trabao a cuminsa yen di brio, fundeshi a wordo cobra y lanta. Pa un of otro motibo e trabao a slow un tiki, pero na anja

1975 e miembronan a sigi trobe yen di brio cu e construccion. Dia 1 di november 1975 e floer a keda cla y e promer piedra a wordo poni. Esey a sosode pa e representante di Lago, Sr. Everett Beaujon. E dia ey el a bisa: No laga esaki ser e promer y ultimo piedra.

Na anja 1975 e club tabata bau presidencia di Sr. Martin Flanegien. Durante '76 a wordo traha duro y ya na mei e ringbalk a wordo basha, hopi cooperacion a wordo ricibi. Na december 1976 bandera a bay halto como senjal di spantenbier y na final di '76 e edificio su dak a keda cla.

Na anja 1977 e trabao di afwerking a cuminsa. Cu alma y curpa a wordo traha. Tur dia nos por a mira p.e. Tomas Figaroa y Chemi Figaroa, tambe Chin Figaroa cu Tarcisio Semeleer ta traha na club. Danki na nan esfuerzonan e club a progresa enormemente.

Na final di 1977 ya tabata na bisto cu e club lo wordo habri pronto y dia 18 di februari 1978 e club a wordo oficialmente habri pa Sr. Pedro (Charro) Kelly deputado di Teritorio Insular di Aruba, asisti pa jiu muher di e fundador. Asina Country Club Noord a drenta den un era di progreso, pero ainda tin hopi trabao cu mester wordo haci. Tempo cu e organizacion a wordo funda e tabatin solamente algun persona cu tabata reuni pa diberti nan mes cu domino etc.



Bandera di C.C.N. a bay den top, na momento cu e punto mas halto a worde alcanzá.

Awor e tin teamnan di futbol organisa y afilia na Arubaanse Voetbal Bond. Un team di Volley damas, afilia na Aruba Volleybal Association. Team di Domino, afilia na Aruba Domino Bond. Tambe ta lantando un team di ping-pong y ya club ta afilia na A.T.T.A.

Riba tereno social nos por mira un fondo di entierro pa e miembronan. Dianan di fiesta ta wordo celebra hunto. Actualmente Country Club Noord tin un damescomite hopi activo y den futuro lo wordo traha riba un comite di juventud.

E directiva actual ta trahando duro riba su plannan cualnan ta inclui un sportveld cu luz, den cual por wordo hunga volley, basket, y tennis.

Redaccion di Taray kier a manda un palabra di pabien pa e miembronan y directiva di Country Club Noord y ta deseanan hopi exito den futuro.



MIRA BON Y ALAVEZ MUSTRA BON